

O'ZBEKISTON RESPUBLIKASI VAZIRLAR MAHKAMASINING
QARORI

**IJARA HUQUQI ASOSIDA YASHAYOTGAN TALABALAR TOMONIDAN TO'LANADIGAN IJARA
TO'LOVLARINI QOPLAB BERISH TIZIMINI JORIY ETISH CHORA-TADBIRLARI TO'G'RSIDA**

O'zbekiston Respublikasi Prezidentining "Yoshlarning tadbirkorlik faoliyatini qo'llab-quvvatlash va bandligiga ko'maklashish, ularni ijtimoiy himoya qilish hamda bo'sh vaqtini mazmunli tashkil etishga oid qo'shimcha chora-tadbirlar to'g'risida" 2021-yil 20-apreldagi PF-6208-son **Farmoni** ijrosini ta'minlash maqsadida Vazirlar Mahkamasi qaror qiladi:

1. O'zbekiston Respublikasi Prezidentining "Yoshlarning tadbirkorlik faoliyatini qo'llab-quvvatlash va bandligiga ko'maklashish, ularni ijtimoiy himoya qilish hamda bo'sh vaqtini mazmunli tashkil etishga oid qo'shimcha chora-tadbirlar to'g'risida" 2021-yil 20-apreldagi PF-6208-son **Farmoni** bilan:

2021-yil 1-maydan boshlab yotoqxonaga bilan qamrab olinmagan va o'ziga, shu jumladan otanasini (qonuniy vakillari)ga tegishli bo'lmagan uyda ijara huquqi asosida yashaydigan davlat oliy ta'lim muassasalari talabalarining 60 foiziga ular tomonidan to'lanadigan oylik ijara to'lovining 50 foizi O'zbekiston Respublikasi Davlat budjeti hisobidan qoplab berilishi, bunda:

ijara to'lovining qoplab beriladigan qismi Toshkent shahrida — bazaviy hisoblash miqdorining bir baravari, qolgan hududlarda — bazaviy hisoblash miqdorining yarim baravaridan oshmasligi;

ijara to'lovining qoplab beriladigan qismi birinchi navbatda ehtiyojmand oila farzandlariga, o'rnak ko'rsatgan va faol talabalar uchun qoplab berilishi;

oliy ta'lim muassasalari tomonidan ularning budjetdan tashqari mablag'lari hisobidan ijara huquqi asosida yashaydigan boshqa talabalarga ham oylik ijara to'lovining bir qismi qoplab berilishi mumkinligi belgilanganligi ma'lumot uchun qabul qilinsin.

2. Quyidagilarni nazarda tutuvchi Davlat oliy ta'lim muassasalarining ijara huquqi asosida yashayotgan talabalariga oylik ijara to'lovining bir qismini O'zbekiston Respublikasi Davlat budjeti hisobidan qoplab berish tartibi to'g'risidagi nizom **ilovaga** muvofiq tasdiqlansin:

davlat oliy ta'lim muassasalarining faqat kunduzgi ta'lim shaklida, davlat granti yoki to'lov-kontrakt asosida tahsil oladigan va ijara huquqi asosida yashaydigan barcha talabalarga oylik ijara to'lovining bir qismini belgilangan mezonlar asosida O'zbekiston Respublikasi Davlat budjeti hisobidan qoplab berish;

ariza beruvchi talaba tomonidan oylik ijara to'lovining bir qismini qoplab berish uchun o'zi ta'lim olayotgan fakul'tetga yoki oliy ta'lim muassasasining talabalarni turar joy bilan ta'minlash ishlarini muvofiqlashtiruvchi bo'limiga yozma ariza bilan murojaat etish tartibi;

davlat oliy ta'lim muassasalarining ijara huquqi asosida yashayotgan talabalariga oylik ijara to'lovining bir qismini O'zbekiston Respublikasi Davlat budjeti hisobidan qoplab berish bo'yicha talabgorlarni tanlab olish komissiyasi tomonidan talabani ijtimoiy mezonlar bo'yicha o'rganish va talabaga oylik ijara to'lovining bir qismini qoplab berishni ko'rib chiqish;

ijara huquqi asosida yashaydigan talabaga oylik ijara to'lovlarning bir qismini qoplab berishni moliyalashtirish va to'lab berish tartibi.

3. Shunday tartib o'rnatilsinki, unga muvofiq davlat oliy ta'lim muassasalari tomonidan ijara huquqi asosida yashayotgan, biroq ijara to'lovlari ushbu qarorda belgilangan tartibda O'zbekiston Respublikasi Davlat budjeti hisobidan qoplanadigan talabalar toifasiga kirmaydagan boshqa talabalarining oylik ijara to'lovi bir qismini ushbu oliy ta'lim muassasasining budjetdan tashqari mablag'lari hisobidan qoplab berish tartibi oliy ta'lim muassasasi kengashi tomonidan mustaqil belgilanadi.

4. O'zbekiston Respublikasi Moliya vazirligi 2021-yilda mazkur qarorda belgilangan vazifalarni amalga oshirish uchun O'zbekiston Respublikasi Oliy va o'rta maxsus ta'lim vazirligi hamda tizimida oliy ta'lim muassasalari bo'lgan vazirlik va idoralarning asoslangan hisob-kitoblariga muvofiq

O‘zbekiston Respublikasi Davlat budgetidan qo‘shimcha mablag‘ ajratsin, 2022-yildan boshlab esa — tegishli mablag‘larni O‘zbekiston Respublikasi Davlat budgeti parametrlarida nazarda tutsin.

5. Mazkur qarorning bajarilishini nazorat qilish O‘zbekiston Respublikasi Bosh vazirining moliya-iqtisodiyot va kambag‘allikni qisqartirish masalalari bo‘yicha o‘rinbosari — iqtisodiy taraqqiyot va kambag‘allikni qisqartirish vaziri J.A. Qo‘chqorov, O‘zbekiston Respublikasi moliya vaziri T.A. Ishmetov hamda O‘zbekiston Respublikasi oliy va o‘rta maxsus ta‘lim vaziri A.X. Toshkulov zimmasiga yuklansin.

O‘zbekiston Respublikasining Bosh vaziri A. ARIPOV

Toshkent sh.,
2021-yil 24-sentabr,
605-son

Vazirlar Mahkamasining 2021-yil 24-
sentabrdagi 605-son qaroriga
ILOVA

Davlat oliy ta‘lim muassasalarining ijara huquqi asosida yashayotgan talabalariga oylik ijara to‘lovining bir qismini O‘zbekiston Respublikasi Davlat budgeti hisobidan qoplab berish tartibi to‘g‘risida

NIZOM

1-bob. Umumiy qoidalar

1. Ushbu Nizom yotoqxonalar bilan qamrab olinmagan va o‘ziga yoki ota-onasi (qonuniy vakillari)ga tegishli bo‘lmagan uyda ijara huquqi asosida yashaydigan davlat oliy ta‘lim muassasalari talabalarining oylik ijara to‘lovi bir qismini O‘zbekiston Respublikasi Davlat budgetidan qoplab berish tartibini belgilaydi.

2. Ushbu Nizomda quyidagi asosiy tushunchalardan foydalaniladi:

ariza beruvchi — yotoqxonalar bilan qamrab olinmagan va o‘ziga yoki ota-onasi (qonuniy vakillari)ga tegishli bo‘lmagan uyda ijara huquqi asosida yashaydigan O‘zbekiston Respublikasi fuqarosi bo‘lgan, shuningdek, respublikada doimiy yashayotgan fuqaroligi bo‘lmagan davlat oliy ta‘lim muassasasining talabasi;

ijtimoiy mezonlar — ijara to‘lovining bir qismini birinchi navbatda olishga muhtoj talabalarni aniqlash va ularning ijtimoiy ustuvorligini belgilashda qo‘llaniladigan asosiy ko‘rsatkichlar;

davlat oliy ta‘lim muassasalarining ijara huquqi asosida yashayotgan talabalariga oylik ijara to‘lovining bir qismini O‘zbekiston Respublikasi Davlat budgeti hisobidan qoplab berish bo‘yicha talabgorlarni tanlab olish komissiyasi (keyingi o‘rinlarda — komissiya) — ariza beruvchilarning ijtimoiy mezonlarga mos kelishini aniqlashga mas‘ul bo‘lgan mazkur Nizomning **1-ilovasiga** muvofiq tarkibda oliy ta‘lim muassasasi rektori (filial direktori) tomonidan tasdiqlanadigan doimiy va jamoatchilik asosida ishlaydigan tuzilma;

talabgor — ijara to‘lovining bir qismini qoplab berish to‘g‘risida komissiya tomonidan ijobiy xulosa olgan talaba.

3. Ijara huquqi asosida yashaydigan talabalarining oylik ijara to‘lovi bir qismini qoplab berish qonunchilik hujjatlari talabalariga muvofiq davlat soliq xizmati organlari tomonidan hisobga qo‘yilgan ko‘chmas mulk ijara shartnomasiga muvofiq ijara huquqi asosida yashaydigan ariza beruvchilarga nisbatan tatbiq etiladi.

Ro‘yxatga olingan doimiy yashash joyi doirasida (tuman, shahar miqyosida) ariza beruvchilarga oylik ijara to‘lovining bir qismini qoplab berish amalga oshirilmaydi.

4. Bitta turar joyda ikki va undan ortiq talaba ijara huquqi asosida yashagan holatlarda ularning barchasi ijara shartnomasida qayd etilgan bo‘lishlari shart.

Bunda:

turar joy ijarasi uchun to‘lov summasi ijara shartnomasida qayd etilgan talabalar o‘rtasida teng bo‘lingan tarzda hisoblanadi;

oylik ijara to‘lovining bir qismini qoplab berish har bir talabaga to‘g‘ri keladigan ijara summasidan kelib chiqib amalga oshiriladi.

5. Ariza beruvchi tomonidan taqdim etilgan ariza va unga ilova qilingan hujjatlar asosida uning ijtimoiy mezonlarga mos kelishini aniqlash komissiya tomonidan amalga oshiriladi.

6. Davlat oliy ta'lim muassasalarining faqat kunduzgi ta'lim shaklida, davlat granti yoki to'lov-kontrakt asosida tahsil olishidan qat'i nazar, ijara huquqi asosida yashaydigan barcha talabalariga oylik ijara to'lovining bir qismi belgilangan mezonlar asosida O'zbekiston Respublikasi Davlat budjeti hisobidan qoplab beriladi.

2-bob. Ijara to'lovining bir qismini qoplab berish uchun ariza bilan murojaat etish

7. Ariza beruvchi mustaqil ravishda quyidagi holatlardan kamida birini tasdiqlovchi ma'lumot yoki hujjatlarni ilova qilgan holda ushbu Nizomning 2-ilovasiga muvofiq shakldagi anketa-arizani ikki nusxada to'ldirib, o'zi ta'lim olayotgan fakultetning yoshlar bilan ishlash bo'yicha dekan o'rinbosari yoki oliy ta'lim muassasasining talabalarni turar joy bilan ta'minlash ishlarini muvofiqlashtiruvchi bo'limiga (keyingi o'rinlarda — mas'ullar) topshiradi:

Oldingi tahrirga qarang.

kam ta'minlangan oilalarning farzandlari bo'lganligi (kam ta'minlangan oila deb topish tuman (shahar) mahalla va nuroniylarni qo'llab-quvvatlash bo'limlari yoki "Ijtimoiy himoya yagona reyestri" avtomatlashtirilgan tizimi tomonidan qonunchilik hujjatlarida belgilangan tartibda amalga oshiriladi);

(7-bandning ikkinchi xatboshisi O'zbekiston Respublikasi Vazirlar Mahkamasining 2022-yil 9-avgustdagi 438-sonli qarori tahririda — Qonunchilik ma'lumotlari milliy bazasi, 10.08.2022-y, 09/22/438/0726-son)

boquvchisini yo'qotgan ko'p bolali oilalar (ota-onasidan biri yoki ota-onasi vafot etgan hamda oilada o'n olti yoshga to'lmagan beshta va undan ortiq bolalari bo'lgan oilalar) farzandlari bo'lganlar;

I va II guruh nogironligi bo'lgan shaxslar;

to'liq davlat ta'minotida bo'lgan yetim bolalar va ota-ona qaramog'idan mahrum bo'lganlar;

vasiylik yoki homiylik belgilangan va oilaga tarbiyaga (patronat) olingan bolalar;

"Temir daftar"ga kiritilgan oila farzandi bo'lganlar;

onasi "Ayollar daftari"ga kiritilgan oila farzandi bo'lganlar;

I va II guruh nogironligi bo'lgan shaxslarning farzandi bo'lganlar;

oilalari "Mehnat-migratsiya" dasturida ro'yxatdan o'tganligi hamda xorijda vaqtinchalik mehnat faoliyatini amalga oshirayotganligi;

ota-onasi ijtimoiy himoyaga muhtoj bo'lganligi (bandligi ta'minlanmagan, ishlash istagida bo'lgan, daromad manbaiga ega bo'lmagan, shu jumladan, mehnat qilish qobiliyatini qisman yo'qotgan);

oliy ta'lim muassasasida ikki va undan ortiq farzandi shartnoma asosida o'qiyotgan oilalar farzandi bo'lganlar;

davlat oliy ta'lim muassasasida o'rnak ko'rsatganligi va faol bo'lganligi (xalqaro, respublika, hudud va ta'lim muassasasi miqyosida o'tkazilgan fan olimpiadalari va sport musobaqalari, ko'rik tanlovlari g'oliblari, fanlardan o'zlashtirish ko'rsatkichlari yuqori bo'lgan, ma'naviy-ma'rifiy va sport tadbirlarida faol qatnashganligi, jamoatchilik asosida targ'ibot guruhlaridagi volontyorlik faoliyati).

Ariza beruvchidan ushbu bandda ko'rsatilmagan ma'lumot va hujjatlarni talab qilishga yo'l qo'yilmaydi.

8. Oylik ijara to'lovining bir qismini qoplab berish:

o'quv yili davomida, ya'ni har yili 1-sentabrdan 1-iyulgacha etib yoki o'qitish dasturi bo'yicha o'quv yilining davomiyligiga qarab belgilanadi;

ariza beruvchi tomonidan har oyning 7-sanasiga qadar arizalar mas'ullarga taqdim etilganidan so'ng amalga oshiriladi.

Ushbu muddatlar tugagandan keyin taqdim etilgan arizalar ko'rib chiqilmaydi.

9. Ariza beruvchi taqdim etilgan hujjatlar va ularda ko'rsatilgan ma'lumotlarning ishonchliligi va haqqoniyligi uchun shaxsan javobgar hisoblanadi.

3-bob. Ariza beruvchini ijtimoiy mezonlar bo'yicha o'rganish tartibi

10. Mas'ullar bir hafta davomida ariza beruvchining ma'lumotlari quyidagi ijtimoiy mezonlarga muvofiqligini har tomonlama o'rganadi:

ariza beruvchining davlat soliq xizmati organlari tomonidan hisobga qo'yilgan ko'chmas mulk ijara shartnomasi mavjudligi, uni tegishli ravishda rasmiylashtirilganligi, ijara shartnomasida ko'rsatilgan manzilda yashashi hamda ijarada yashayotgan manzil ota-onasi (qonuniy vakillari)ga tegishli emasligi;

ariza beruvchining boquvchisini yo'qotgan oilalar farzandlari toifasiga mansubligi;

ariza beruvchining I va II guruh nogironligi mavjud, to'liq davlat ta'minotida bo'lgan yetim bolalar va ota-ona qaramog'idan mahrum bo'lgan bolalar, vasiylik yoki homiylik belgilangan va oilaga tarbiyaga (patronat) olingan bolalar toifasiga mansubligi;

ariza beruvchining "Temir daftar"ga kiritilgan yoki onasi "Ayollar daftari"ga kiritilgan oilalar, I va II guruh nogironligi bo'lgan shaxslarning farzandligiga mansubligi;

ariza beruvchining oila a'zolari "Mehnat-migratsiya" dasturida ro'yxatdan o'tganligi hamda xorijda vaqtinchalik mehnat faoliyatini amalga oshirayotganligi (oshirganligi);

ariza beruvchining ota-onasi ijtimoiy himoyaga muhtoj bo'lganligi, oliy ta'lim muassasasida ikki va undan ortiq farzandi shartnoma asosida o'qiyotgan oilalar farzandi bo'lganlar toifasiga mansubligi;

ariza beruvchining oliy ta'lim muassasasida o'rnak ko'rsatganligi va faol bo'lganligi.

11. Mas'ullar hafta davomida o'rganilgan ma'lumotlarni umumlashtirib, ko'rib chiqish va xulosa berish uchun navbatdagi haftaning birinchi kunida komissiyaga taqdim etadi.

4-bob. Oylik ijara to'lovining bir qismini qoplab berishni komissiya tomonidan ko'rib chiqish tartibi

12. Mas'ullar taqdim etgan talabgorlar to'g'risidagi ma'lumotlar bir kun muddatda komissiya tomonidan o'rganib chiqiladi va tegishli qaror qabul qilinadi.

13. Komissiya ishining tashkiliy shakli yig'ilish hisoblanadi. Komissiya majlislari komissiya a'zolarining kamida uchdan ikki qismi qatnashgan taqdirda o'tkaziladi. Bunda, talabgor ta'lim olayotgan fakultet dekanining masalaga mas'ul o'rinbosari, tyutor, xotin-qizlar kengashi raisi, yoshlar yetakchisi bir vaqtning o'zida komissiya yig'ilishida ishtirok etishi shart.

14. Komissiya yig'ilishlarida ishtirok etayotgan a'zolarining uchdan ikki qismi yoqlab ovoz bergan komissiya qarorlari qabul qilingan hisoblanadi va ushbu yig'ilishlarda qabul qilingan qarorlar yig'ilish kotibi tomonidan bayonnoma bilan rasmiylashtiriladi.

15. Komissiyaning barcha yig'ilishlari bayonnoma bilan rasmiylashtiriladi va qaror shaklida qabul qilinadi.

16. Komissiya uning vakolatlariga tegishli masalalarni komissiya raisi boshchiligida o'tkaziladigan yig'ilishlarda ko'rib chiqadi.

17. Komissiya raisi:

komissiyaning umumiy faoliyatiga rahbarlik qiladi, uning ish rejasi bajarilishi yuzasidan doimiy nazoratni amalga oshiradi;

komissiyaning yig'ilishlarini chaqiradi va ularda raislik qiladi;

komissiya vakolatiga tegishli bo'lgan masalalarni uning yig'ilishida ko'rib chiqish uchun kiritadi;

komissiya qarorlarini tasdiqlaydi.

18. Komissiya kotibi:

komissiya raisining topshiriqlariga asosan komissiya a'zolarini komissiya yig'ilishining o'tkaziladigan joyi, vaqti va sanasi to'g'risida xabardor qiladi;

komissiya ish rejalarini tayyorlaydi;

komissiya bayonnomalarini yuritadi va tasdiqlangan bayonnomalarni komissiya a'zolariga yuboradi;

komissiya dalolatnomalari va xulosalarini manzillarga yetkazadi; komissiya ish yurituvini amalga oshiradi.

19. Komissiya hujjatlari davlat oliy ta'lim muassasasining arxivida belgilangan muddatgacha saqlanadi.

20. Zarurat bo'lganda, taqdim etilgan hujjatlardagi ma'lumotlarga aniqlik kiritish maqsadida ariza beruvchi suhbat uchun Komissiya yig'ilishiga chaqirilishi mumkin.

21. Komissiya arizalarni navbat asosida ularning qayd etilishi ketma-ketligiga muvofiq ko'rib chiqadi.

Komissiya yig'ilishlari, ularning oshkoraligi va xolisligini ta'minlash maqsadida uzluksiz videotasvirga (ovozli) tushiriladi hamda oliy ta'lim muassasasi arxivida belgilangan muddatgacha saqlanadi.

22. Komissiya taqdim etilgan hujjatlar va ma'lumotlar asosida hamda ijtimoiy mezonlarga ko'ra ariza beruvchiga oylik ijara to'lovining bir qismini qoplab berish yoki berishni rad etish to'g'risida qaror qabul qiladi.

Talabgorlarni tanlash komissiya tomonidan qonuniylik, shaffoflik, adolat va haqqoniylik tamoyillari asosida amalga oshiriladi.

Oylik ijara to'lovining bir qismini qoplab berish yoki berishni rad etish to'g'risida komissiya maxsus reyestrni yuritadi.

23. Ko'rib chiqish yakunlari bo'yicha komissiya yig'ilishining bayonnomasi asosida bir kun muddatda davlat oliy ta'lim muassasasi rektori (filial direktori)ning tegishli buyrug'i rasmiylashtirilib, arizalari qanoatlantirilgan Talabgorlar to'g'risidagi tegishli ma'lumotlar va ularning ro'yxati to'lovlarni amalga oshirish uchun buxgalteriyaga taqdim etiladi.

Komissiyaning ijara to'lovining bir qismini to'lab berish yoki ijara to'lovining bir qismini to'lab berishni rad etish to'g'risidagi qarori asoslantirilgan ravishda oliy ta'lim muassasasining tegishli e'lonlar taxtalari, rasmiy saytlarida aks ettirilishi komissiya kotibi tomonidan ta'minlanadi.

24. Mazkur Nizomning **7-bandiga** muvofiq belgilangan mezonlar asosida baholangan ariza beruvchi undagi birorta mezonga to'g'ri kelgan taqdirda, u talabgor sifatida tan olinib, oylik ijara to'lovining bir qismini qoplab berishga haqli deb topiladi. Talabgorlar mezonlarning ketma-ketligiga qarab birinchi navbatdagi talabgor sifatida tan olinadi va ustunlikka ega bo'ladi.

25. Quyidagi holatlarda ariza beruvchiga oylik ijara to'lovining bir qismini qoplab berish rad etilishi mumkin:

ushbu Nizomning **7-bandida** ko'rsatilgan holatlardan kamida birini tasdiqlovchi ma'lumot yoki hujjatlar to'liq taqdim etilmaganda;

taqdim etilgan hujjatlardagi ma'lumotlar belgilangan mezonlarga mos kelmaganda;

ariza beruvchining ijara shartnomasida ko'rsatilgan manzilda yashamasligi, ijarada yashayotgan manzil ota-onasi (qonuniy vakillari)ga tegishli ekanligi, ijara shartnomasi tegishli tartibda rasmiylashtirilmaganligi;

taqdim etilgan hujjatlarda noto'g'ri yoki soxta ma'lumotlar mavjud bo'lganda;

ariza va tegishli hujjatlar qabul qilishning oxirgi sanasi tugagandan keyin taqdim etilganda.

26. Oylik ijara to'lovining bir qismini qoplab berishni rad etish to'g'risidagi qarorda ko'rsatilgan kamchiliklarni to'g'rilash imkoniyati bo'lgan taqdirda ariza beruvchi ushbu Nizomda belgilangan umumiy tartibda takroran murojaat qilishga haqli.

5-bob. Oylik ijara to'lovining bir qismini qoplab berishni moliyalashtirish va to'lab berish tartibi

27. Qonunchilik hujjatlarida belgilangan muddatlarda davlat oliy ta'lim muassasasi ijara huquqi asosida yashayotgan talabalarning jami sonini, shuningdek, uning 60 foizini alohida ko'rsatgan holda asoslantirilgan hisob-kitoblarni yuqori turuvchi vazirlik va idoralarga taqdim etishlari lozim.

28. Vazirlik va idoralar o'z navbatida davlat oliy ta'lim muassasalari tomonidan taqdim etilgan hisob-kitoblarni jamlab, belgilangan tartibda Davlat budjetidan tegishli mablag'larni ajratish uchun Moliya vazirligiga taqdim etadilar.

29. Davlat budjetidan mazkur maqsadlar uchun ajratiladigan mablag'lar oliy ta'lim muassasasi xarajatlar smetasining "47.21.500 — Uy-joy-kommunal xizmatlar bo'yicha har oylik kompensatsiya to'lovlari" moddasida rejalashtiriladi.

30. Arizasi ijobiy hal etilgan talabalar uchun ijara to'lovining bir qismi O'zbekiston Respublikasi Davlat budjeti mablag'lari hisobidan ular ariza bergan sanadan boshlab qoplab beriladi.

31. Davlat oliy ta'lim muassasasi rektori (filial direktori)ning tegishli buyrug'iga muvofiq muassasa buxgalteriyasi tomonidan ijara haqining bir qismini qoplash uchun beriladigan mablag'lar talabgorning plastik kartasiga pul o'tkazish yo'li bilan har oyning 15-sanasiga qadar to'lab beriladi.

32. Ijara huquqi asosida yashayotgan talabalar ijara to'lovining bir qismini qoplab berish uchun davlat oliy ta'lim muassasalariga budjetdan ajratilgan mablag'larning tegishli moliya yili yakuniga qadar o'zlashtirilmay qolgan qismi belgilangan tartibda Davlat budjetiga qaytariladi.

6-bob. Yakunlovchi qoidalar

33. Talaba o'quv yili davomida akademik ta'tilga chiqqan, kursda qoldirilgan yoki talabalar safidan chetlashtirilgan hollarda, unga ijara haqining bir qismini qoplash uchun beriladigan mablag'larni to'lash to'xtatiladi.

34. Talabgor ariza va unga ilova qilingan hujjatlarda ko'rsatilgan ma'lumotlarni, shuningdek taqdim etilgan ijara shartnomasi bekor qilinganda yoki yashash manzili o'zgarganda uch ish kuni ichida mas'ullarga hamda oliy ta'lim muassasasi buxgalteriyasiga xabar berishi shart.

35. Mazkur to'lovlarning to'g'ri hisoblanishi va to'lanishini doimiy nazorat qilish davlat oliy ta'lim muassasasi rektori (filial direktori), yoshlar masalalari va ma'naviy-ma'rifiy ishlar bo'yicha prorektori (direktor o'rinbosari), bosh buxgalteri va bosh auditori zimmasiga yuklanadi.

36. Oylik ijara to'lovi bir qismini qoplab berish bo'yicha ajratilgan mablag'lar ortiqcha to'langanda, davlat oliy ta'lim muassasasining mas'ullari hamda buxgalteriyasi tomonidan mazkur mablag'larni qaytarish choralari ko'riladi.

Oldingi tahrirga qarang.

37. O'zbekiston Respublikasi Davlat budjetidan oylik ijara to'lovining bir qismini qoplab berish bo'yicha mablag'larni talabgorlarga to'lanishi yuzasidan nazorat O'zbekiston Respublikasi Moliya vazirligi huzuridagi Davlat moliyaviy nazorati inspeksiyasi hamda vazirlik va idoralarning Ichki audit va moliyaviy nazorat xizmatlari tomonidan amalga oshiriladi.

(37-band O'zbekiston Respublikasi Vazirlar Mahkamasining 2022-yil 5-avgustdagi 431-sonli qarori tahririda — Qonunchilik ma'lumotlari milliy bazasi, 06.08.2022-y., 09/22/431/0716-son)

38. Ushbu Nizomni qo'llashda yuzaga keladigan nizolar qonunchilik hujjatlarida belgilangan tartibda hal etiladi.

39. Mazkur Nizom talabalarining buzilishida aybdor bo'lgan shaxslar qonunchilikka muvofiq javob beradilar.

Davlat oliy ta'lim muassasalarining
ijara huquqi asosida yashayotgan
talabalariga oylik ijara to'lovining bir
qismini O'zbekiston Respublikasi
Davlat budjeti hisobidan qoplab
berish tartibi to'g'risidagi **nizomga**
1-ILOVA

Davlat oliy ta'lim muassasalarining ijara huquqi asosida yashayotgan talabalariga oylik ijara to'lovining bir qismini O'zbekiston Respublikasi Davlat budjeti hisobidan qoplab berish bo'yicha talabgorlarni tanlab olish komissiyasining

NAMUNAVIY TARKIBI

1. Lavozimiga ko'ra — Yoshlar masalalari va ma'naviy-ma'rifiy ishlar bo'yicha prorektor (direktor o'rinbosari), Komissiya raisi
2. Lavozimiga ko'ra — Talabalarni turar joy bilan ta'minlash ishlarini muvofiqlashtiruvchi bo'lim boshlig'i

3. Lavozimiga kura — Oliy ta'lim muassasasining Xotin-qizlar kengashi raisi
4. Lavozimiga kura — Tegishliligi bo'yicha fakultet dekanining yoshlar bilan ishlash bo'yicha o'rinbosari
5. Lavozimiga ko'ra — Oliy ta'lim muassasasining Yoshlar yetakchisi
6. Lavozimiga ko'ra — Tyutor
7. Lavozimiga ko'ra — Bosh auditor
8. Lavozimiga ko'ra — Buxgalteriya mas'ul xodimi
9. Lavozimiga ko'ra — Talabalarni turar joy bilan ta'minlash ishlarini muvofiqlashtiruvchi bo'lim mas'ul xodimi, Komissiya kotibi

Davlat oliy ta'lim muassasalarining
ijara huquqi asosida yashayotgan
talabalariga oylik ijara to'lovining bir
qismini O'zbekiston Respublikasi
Davlat budjeti hisobidan qoplab
berish tartibi to'g'risidagi [nizomga](#)
2-ILOVA

